

DOMINGU I TEMPU ADVENTU – TINAN C

Tema Domingu dahuluk nian

Iha Domingu dahuluk Tempu Adventu nian, Maromak nia Liafuan aprezena mai ita aprosimasaun dahuluk ba Na'i ne'ebé atu mai.

Iha *leitura dahuluk*, liuhusi profeta Jeremias nia ibun, Maromak aliansa nian haklaken katak nia fiél ba ninia promesa sira no sei haruka ba nia Povu “tubun” ida husi família David nian. Nia misaun maka konkretiza mehi kona-ba mundu ida dame no justisa nian: fekundidade, moris di'ak, moris naresin, maka rezultadu sira husi Mesias nia hahalok sira.

Evanjellu aprezena Jezús mai ita, Mesias David nia oan, haklaken hela ba ema sira ne'ebé sente an nu'udar dadur: “haksolok bá, imi-nia libertasaun besik daudaun ona. Mundu tuan ne'ebé dadur imi atu monu daudaun no, iha nia fatin, sei moris mundu foun ida, iha-ne'ebé imi sei koñese liberdade no moris nakonu. Matan moris bá, atu simu Mane Makso'ik ne'ebé lori mai imi projetu mundu foun ne'e nian”. Presiza rekoñese nia, hatene identifika ninia apelu sira no iha korajen atu harii, hamutuk ho Nia, justisa no dame.

Leitura daruak konvida ita atu keta hela iha mediokridade no komodizmu, maibé hein ho atitude ativa Na'i ne'ebé atu mai. Fundamentál tebes iha atitude ida-ne'e, moris iha domin: nia mak sentru ba ita-nia sasin pesoál, komunitáriu, ekleziál.

LEITURA I – Jer 33,14-16

MENSAJEN

Iha momentu limite nian bainhira buat hotu parese komprometidu, Jeremias haklaken fidelidade Jahwéh nian ba promesa sira halo ba David (kf. 2 Sm 7): iha futuro, Maromak sei halo mosu David nia beioan ida (“zemah zaddîq” – “tubun justu”), ne'ebé sei asegura dame no salvasaun ba povu tomak. Liafuan “zemah” (“tubun”) fó hanoin kona-ba fekundidade no moris naresin (kf. Is 4,2; Ez 16,7). Ne'e mak naran ne'ebé profeta Zacarias uza atu bolu “Mesias” (kf. Zac 3,8; 6,12).

Liafuan sira liga ho área “justisa” nian hala'o papél fundamentál ida iha anúnsiu Jeremias nian. Nia hateten katak David nia jersaun ne'e mak ema ida “justu” no nia knaar konsiste iha asegura “justisa” no “direitu” (“mishpat” e “zedaqa”). Kaduak “justisa/direitu”, karakteristiká linguajen profétika, refere ba funksionamentu loos instituisaun responsavel ba administrasaun justisa nian (tribunál) ne'ebé sei halo posivel orden sosiál loos (“zedaqa”), fundamentu dame no prosperidade nian. Liurai Sedecias la garante justisa no la asegura mós dame; tanba ne'e, katástrofe atu mosu daudaun... Maibé liurai futuro ne'ebé profeta haklaken, husi David nia jersaun, mak “Mesias” Maromak nian. Nia misaun mak lori fali “justisa” no lori vida naresin no salvasaun ba Maromak nia Povu. Tan ne'e sei hanaran nia “Na'i mak ita-nia justisa” (“Jahwéh zidqenû”): liuhusi nia, Maromak garante ba nia Povu futuro fekundu ida, justisa nian, moris di'ak nian, salvasaun nian.

Hodi hanoin promesa sira Maromak nian, profeta elimina nostalgja tempu uluk nian, elimina ta'uk ba prezente no hametin rejime ida esperansa nian.

LEITURA II – 1 Tes 3,12–4,2

MENSAJEN

Maski Maromak harii ona buat hotu iha fiar-na'in sarani sira Tessalónica nia fuan laran, dalam sarani nian seidak hotu. Presiza halo dalam nafatin (1 Tes 4,1), liuliu buras iha domin ba ema hotu (1 Tes 3,12). Iha attitude ida-ne'e de'it katak, la para atu buras ba beibeik mak bele hein Na'i Jezús Kristu ne'ebé mai (1 Tes 3,13).

EVANJELLU – Lc 21,25-28.34-36

MENSAJEN

Estrutura Evanjellu ohin ninia fiu konduór mak referénsia ba Mane Makso'ik nia mamaik “ho kbiit no glória” (Lc 21,27) no konvite atu ba esperansa no foti sa'e ulun basá “libertasaun atu to'o daudaun” (Lc 21,28). Liafuan “libertasaun” (“apolytrôsis” – “selu ema daduur ida nia moris”) mak liafuan ida karakterístika teolojia paulina nian (1 Cor 1,30; kf. Rom 3,24; 8,23; Col 1,14...), ne'ebé uza atu define rezultadu Kristu nia hahalok salvasaun nian ba ema sira nia di'ak. Projetu salvasaun/libertasaun umanidade nian, ne'ebé konkretiza iha Jezús nia liafuan no jestu sira, apresenta nu'udar “selu ema dadur” (resgate) tanba egoíзму, salan, mate.

Nune'e, ida-ne'e mak libertasaun husi buat hotu ne'ebé halo ema sai atan ka impede ema sira atu moris ho dignidade Maromak nia oan sira-nian.

Mensajen ne'ebé propoin ba eskolante sira mak: imi sei hetan terus no persegisaun (kf. Lc 21,12-19); biar nune'e, keta husik dezesperu halakon imi-nia kbiit basá Jezús mai. Ho ninia mamaik iha glória (horisehik, ohin, aban), moris atan nia sei hotu no sira sei haree vida naresin no sei mosu mai mundu foun ida nakonu ho ksolok.

Sinal sira katástrofe nian la'ós sinal rai nabeen nian, ka mundu nia rohan; sira mak ilas ne'ebé profeta sira uza atu ko'alia kona-ba “Na'i nia laron”, katak laron ne'ebé Jahwéh sei intervein iha istória atu so'i ho modu definitivu nia Povu husi moris atan nian, hodi inaugura tempu ida vida nian, fekundidade no dame rohan-laek nian (kf. Is 13,10; 34,4). Kuadru katástrofe nian la'ós atu hamta'uk, maibé atu loke fuan sira ba esperansa: bainhira Jezús mai ho ninia autoridade aas liu, mundu tuan egoíзму no atan nian sei monu no sei mosu mai laron foun libertasaun/salvasaun ne'ebé la nahas.

Ikus nian, iha mós konvite ba vijilánsia (kf. Lc 21,34-36): presiza mantein atensaun konstante, atu preokupasaun rai nian no kadeia sira ne'ebé halo ema sai atan, la impede atu eskolante sira rekoñese no simu Na'i ne'ebé mai.